

VENDIM
Nr. 408, datë 8.5.2013

PËR DËMSHPËRBLIMIN PËR KAFSHËT E ELIMINUARA¹

(Ndryshuar me VKM nr. 945, datë 28.12.2016; nr. 754, datë 13.12.2017; nr. 544, datë 19.9.2018)

(I përditësuar)

Në mbështetje të nenit 100 të Kushtetutës dhe të nenit 49 të ligjit nr. 10 465, datë 29.9.2011 “Për shërbimin veterinar në Republikën e Shqipërisë”, me propozimin e Ministrit të Bujqësisë, Ushqimit dhe Mbrojtjes së Konsumatorit, Këshilli i Ministrave

VENDOSI:

1. Pronarët e kafshëve, të cilat janë eliminuar, në zbatim të vendimit të marrë nga autoriteti kompetent, ose për të cilat është provuar që kanë ngordhur pas zbatimit të masave të parashikuara në programin shtetëror të profilaksisë veterinarë, dëmshpërblehen në masën e vlerës së dëmit, sipas pikës 13 të këtij vendimi.

1.1 Pronarët e kafshëve, që kanë ngordhur si pasojë e prekjes nga sëmundja e Dermatozës Nodulare të Gjdhit, gjatë viteve 2016 e 2017, dhe nuk janë dëmshpërblyer fizikisht me kafshë, do të shpërblehen në masën e vlerës së dëmit, sipas pikës 13, të këtij vendimi.

2. Janë subjekt dëmshpërblimi sipas pikave 1 dhe 1.1, të këtij vendimi, vetëm pronarët e kafshëve, të cilat:

a) janë eliminuar për arsye se kanë rezultuar pozitiv për sëmundje infektive gjatë gjurmimeve diagnostikuese të ushtruara nga shërbimi veterinar rajonal, në zbatim të programit shtetëror të masave profilaktike veterinarë, pas testimeve në terren dhe në bazë të rezultateve të analizave të kryera në laboratorët e autorizuar ose në laboratorët e Institutit të Sigurisë Ushqimore dhe Veterinarisë;

b) kanë ngordhur si pasojë e zbatimit nga shërbimi veterinar rajonal i masave të programit shtetëror të profilaksisë veterinarë;

c) kanë ngordhur si pasojë e një sëmundjeje, kontrolli i së cilës mbështetet financiarisht nga shteti, sipas listës së sëmundjeve, të miratuar me urdhër të ministrit.

3. Eliminimi dhe propozja e kafshëve që përfshihen në rastet e shkronjave “a”, “b” dhe “c” të pikës 2 të këtij vendimi, për qëllimet e marrjes së dëmshpërblimit, kryhet në prani të komisionit të përhershëm të ngritur me urdhër të titullarit të Agjencisë Rajonale të Shërbimit Veterinar dhe Mbrojtjes së Bimëve (ARSHVMB).

4. Komisioni i ngritur sipas pikës 3 të këtij vendimi, kryesohet nga përgjegjësi i shërbimit veterinar në Agjencinë Rajonale të Shërbimit Veterinar dhe Mbrojtjes së Bimëve (ARSHVMB) dhe përbëhet nga veterinar i zyrtar i territorit ku eliminohet kafsha, veterinar i privat që ushtron veprimtarinë në territorin në fjalë, përfaqësuesi i zyrës së financës në Agjencinë Rajonale të Shërbimit Veterinar dhe Mbrojtjes së Bimëve (ARSHVMB) dhe një përfaqësues i qeverisjes vendore. Në rastin kur shkatërrohen koshere të bletëve, shtohet dhe një përfaqësues nga një shoqatë e bletërritësve.

5. Komisioni harton procesverbalin e eliminimit të kafshës, në prani të pronarit të kafshës së

¹ VKM nr.408, datë 8.5.2013 është botuar në Fletoren Zyrtare nr.87, datë 24 maj 2013.

VKM nr.945, datë 28.12.2016 është botuar në Fletoren Zyrtare nr.260, datë 9 janar 2017.

VKM nr.754, datë 13.12.2017 është botuar në Fletoren Zyrtare nr.225, datë 22 dhjetor 2017.

VKM nr.544, datë 19.9.2018 është botuar në Fletoren Zyrtare nr.138, datë 26 shtator 2018.

eliminuar. Procesverbali firmoset dhe vuloet në vend nga anëtarët e komisionit dhe nga pronari i kafshës.

6. Procesverbali përgatitet në tri kopje të njëjta origjinale, nga të cilat njëra i lihet pronarit të kafshës së eliminuar, njëra mbahet në shërbimin veterinar të *Agjencisë Rajonale të Shërbimit Veterinar dhe Mbrojtjes së Bimëve (ARSHVMB)* dhe tjetra qëndron në strukturën përgjegjëse të njësive të vetëqeverisjes vendore. Modeli i procesverbalit të vlerësimit të kafshës përgatitet nga Drejtoria e Shërbimit Veterinar në ministri dhe miratohet me urdhër të ministrit.

7. Eliminimi ose guposja e kafshëve bëhet:

a) brenda 30 (tridhjetë) ditëve, për kafshët e rezultuara të infektuara gjatë kontrollit të tyre për brucelozë;

b) brenda 30 (tridhjetë) ditëve, për kafshët e rezultuara të infektuara gjatë kontrollit të tyre për tuberkuloz;

c) menjëherë pas konfirmimit zyrtar, në rastin e sëmundjes së tërbimit;

ç) menjëherë, në rastin kur dyshohet dhe është raportuar zyrtarisht nga pronari i kafshës te veterinari zyrtar se ngordhja është shkaktuar nga sëmundja e plasjes.

d) menjëherë, pas konfirmimit zyrtar, në rastin e sëmundjes së *Dermatozës Nodulare të Gjedhit*.

8. Procedura për dhënien e dëmshpërblimit për kafshët e eliminuara dhe të guposura, të cilat përmbushin kriteret e pikave 2 e 3, fillon brenda 15 (pesëmbëdhjetë) ditëve nga eliminimi dhe guposja e kafshës. Agjencia Rajonale e Shërbimit Veterinar dhe Mbrojtjes së Bimëve (ARSHVMB), përgatit dosjen me kopjet e këtij dokumentacioni:

a) Pasaportën e kafshës që eliminohet dhe matrikullin individual të saj;

b) Procesverbalin e eliminimit dhe të guposjes, në përputhje me pikën 3, të këtij vendimi;

c) Sipas rastit, dokumentet veterinarë për zbatimin e masave sanitaro-veterinare në fermë, të urdhëruara nga shërbimi veterinar, në bazë të të cilave është vendosur eliminimi dhe guposja e kafshës;

ç) Dokumentin që provon shitjen e produktit dhe çmimin, në rastet sipas pikës 13, i cili paraqitet nga pronari i kafshës.

9. Titullari i *Agjencisë Rajonale të Shërbimit Veterinar dhe Mbrojtjes së Bimëve (ARSHVMB)* së qarkut ngre komisionin e vlerësimit të vlerës së kafshës së eliminuar dhe guposur, për të cilën do të bëhet dëmshpërblimi.

10. Komisioni i ngritur kryesohet nga përgjegjësi i shërbimit veterinar në *Agjencinë Rajonale të Shërbimit Veterinar dhe Mbrojtjes së Bimëve (ARSHVMB)* dhe përbëhet nga specialisti i sektorit të financës, veterinari zyrtar i zonës ku dëmshpërblehet kafsha dhe zootekniku i *Agjencisë Rajonale të Shërbimit Veterinar dhe Mbrojtjes së Bimëve (ARSHVMB)*.

11. Komisioni vlerëson rregullsinë e dokumentacionit përkatës dhe mban procesverbalin e miratimit të dëmshpërblimit në vlerën e caktuar. Procesverbali firmoset dhe vuloet në vend nga anëtarët e komisionit. Tipi i modelit të procesverbalit të dëmshpërblimit miratohet me urdhër të ministrit ose procesverbalin e dëmshpërblimit fizik në kafshë.

12. Procesverbali përgatitet në dy kopje të njëjta origjinale, nga të cilat njëra i dorëzohet pronarit të kafshës që dëmshpërblehet, tjetra mbahet në shërbimin veterinar të *Agjencisë Rajonale të Shërbimit Veterinar dhe Mbrojtjes së Bimëve (ARSHVMB)*

13. Vlera e dëmshpërblimit për kafshën, e miratuar nga komisioni, do të përcaktohet nga vlera mesatare e tregut për llojin e kafshës në rajonin përkatës, gjatë muajit paraardhës, të përlogaritur nga sektori i statistikës në ministri. Për rastet kur produktet e marra nga therja e kafshës së eliminuar, për shkak të kushteve të përmendura në shkronjën “a” të pikës 2 të këtij vendimi, mund të shiten, vlera e produktit të shitur do t’i zbritet vlerës së pagesës së dëmshpërblimit të përcaktuar sipas pikës 11 të këtij vendimi.

14. Titullari i ARSHVMB-së nxjerr aktin për dëmshpërblimin e pronarit të kafshës, që duhet të zbatohet nga ARSHVMB-ja brenda 30 (tridhjetë) ditëve nga dalja e aktit të dëmshpërblimit.

15. Nuk dëmshpërblehen pronarët e kafshëve për të cilat nuk paraqitet dokumentacioni sipas pikës 8 të këtij vendimi.

16. Nuk përfitojnë dëmshpërblimin, sipas këtij vendimi, të gjithë pronarët e kafshëve në rastet

kur:

a) nuk kanë vënë në dispozicion kafshët e tyre për identifikimin dhe zbatimin e programit shtetëror të masave profilaktike veterinarë;

b) nuk kanë njoftuar menjëherë për shfaqjen e sëmundjes infektive;

c) nuk kanë zbatuar masat e përcaktuara nga veterinarët zyrtarë për dyshimin ose konfirmimin e sëmundjes;

ç) sëmundja në kafshë shfaqet gjatë importit ose gjatë karantinës së kafshëve të importuara dhe kur pronari është vetë fajtor për shpërthimin e sëmundjes, duke blerë kafshë të sëmura ose të dyshimta, të pashoqëruara me certifikatë veterinarë;

d) sëmundja në kafshë shfaqet pasi ato janë ushqyer në zona të ndaluara;

dh) kanë shkelur kërkesat mjekësore veterinarë për mbarështimin e kafshëve;

e) nuk është kryer eliminimi i kafshëve në afatet e përcaktuara sipas pikës 7 të këtij vendimi.

17. Ngarkohen Ministria e Bujqësisë dhe Zhvillimit Rural, agjencitë rajonale të shërbimit veterinar dhe mbrojtjes së bimëve dhe strukturat përgjegjëse të njësive të vetëqeverisjes vendore për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI

Sali Berisha